



Headline: Taktik baharu Macau Scam  
Publication/Portal: Sinar Harian  
Date: 12 October 2019

Language: Malay  
Section: Nasional  
Page: 34

## Taktik baharu Macau Scam

**PORT DICKSON** - Sindiket Macau Scam dikesan menggunakan taktik terbaharu untuk memperdaya mangsa dengan meminta mereka mengemas kini akaun bank.

Ketua Polis Daerah Port Dickson, Superintendan Aidi Sham Mohamed berkata, dalam kejadian Rabu lalu, seorang suri rumah dari Tanjung Gemuk, di sini tertipu dengan modus operandi terbabit sehingga mengalami kerugian RM49,999.87.

Menurutnya, mangsa berusia 47 tahun dihubungi 'pegawai bank' dan mendakwa mangsa mempunyai tunggakan kad kredit sebanyak RM7,000 dengan sebuah bank di Puchong.

"Mangsa menafikan perkara itu dan panggilan kemudian disambungkan kepada individu lain yang menyamar sebagai polis dan meminta mangsa menyerahkan butiran akaun bank berserta jumlahnya," katanya.

Beliau berkata, mangsa kemudian diminta ke sebuah bank di Port Dickson dan diberikan tiga kod nombor untuk dimasukkan ke mesin pengeluaran wang (ATM).

"Mangsa yang bimbang mengikut arahan tersebut dan sedar ditipu apabila melihat resit bank yang menyatakan berlaku pindahan wang dari akaunnya berjumlah RM49,999.87 ke sebuah akaun tidak dikenali," katanya.